

সারা দেশে শিক্ষার্থীদের ওপর ছাত্রলীগের হামলা, প্রধানমন্ত্রীর বক্তব্য প্রত্যাহার ও কোটা প্রথার যৌক্তিক সমাধানের দাবিতে বিভিন্ন স্থানে বিক্ষোভ মিছিল, সমাবেশ ও সড়ক অবরোধ করেছেন শিক্ষার্থীরা। আজ মঙ্গলবার দুপুর থেকে বিকেল পর্যন্ত এসব কর্মসূচিতে বিশ্ববিদ্যালয়, কলেজসহ বিভিন্ন শিক্ষাপ্রতিষ্ঠানের শিক্ষার্থীরা অংশ নেন।

পঞ্চগড়

পঞ্চগড়ে আজ বেলা ১১টা থেকে শুরু হয়ে আড়াইটা পর্যন্ত বিভিন্ন প্রতিষ্ঠানের শিক্ষার্থীরা পৃথক পৃথক মিছিল নিয়ে শহরের চৌরঙ্গী মোড়ে কেন্দ্রীয় শহীদ মিনারের সামনে এসে জড়ো হন। দুপুর পর্যন্ত স্লোগান ও মিছিলে মুখর হয়ে ওঠে পুরো এলাকা। বেলা সোয়া একটার দিকে জেলা জজ কোর্টসংলগ্ন পঞ্চগড়-বাংলাবান্ধা মহাসড়ক থেকে সাধারণ শিক্ষার্থীদের ব্যানারে বিক্ষোভ মিছিল বের করা হয়। মিছিলটি শহরের প্রধান সড়ক দিয়ে চৌরঙ্গী মোড়ে এসে কেন্দ্রীয় শহীদ মিনারের সামনে এসে শেষ হয়। সেখানে একটি সংক্ষিপ্ত বিক্ষোভ সমাবেশ হয়।

বেলা পৌনে দুইটার দিকে পঞ্চগড়ের মকবুলার রহমান সরকারি কলেজ চত্বর থেকে বিক্ষোভ মিছিল বের করেন সাধারণ শিক্ষার্থীরা। পরে তাঁরা মসজিদপাড়া হয়ে মিছিল নিয়ে জেলা শহরের চৌরঙ্গী মোড়ে কেন্দ্রীয় শহীদ মিনারের সামনে জড়ো হন। সেখানে মকবুলার রহমান সরকারি কলেজের রাষ্ট্রবিজ্ঞান বিভাগের প্রথম বর্ষের ছাত্রী সুরাইয়া আক্তার ও ঢাকার তেজগাঁও কলেজের শিক্ষার্থী মোকদ্দেসুর রহমান সান বক্তব্য দিয়ে বিক্ষোভের সমাপ্তি ঘোষণা করেন।

পঞ্চগড়ে শিক্ষার্থীদের বিক্ষোভ মিছিল

পঞ্চগড়ে শিক্ষার্থীদের বিক্ষোভ মিছিলছবি: প্রথম আলো

এদিকে বেলা আড়াইটার দিকে ‘কোটা আন্দোলনের নামে স্বাধীনতাবিরোধী স্লোগান ও অস্থিতিশীল পরিবেশ সৃষ্টি করার প্রতিবাদে’ মকবুলার রহমান সরকারি কলেজ থেকে একটি বিক্ষোভ মিছিল বের করেন ছাত্রলীগের নেতা-কর্মীরা। জেলা ছাত্রলীগের সভাপতি আবু মো. নোমান হাসান ও সাধারণ সম্পাদক সাদমান সাকিব পাটোয়ারীর নেতৃত্বে মিছিলটি জেলা শহরের চৌরঙ্গী মোড়ে কেন্দ্রীয় শহীদ মিনারের সামনে গিয়ে শেষ হয়।

চাঁদপুর

চাঁদপুর শহরের হাসান আলী সরকারি উচ্চবিদ্যালয় মাঠ থেকে বিভিন্ন শিক্ষাপ্রতিষ্ঠানের কয়েক শ শিক্ষার্থী বেলা সাড়ে তিনটায় বিক্ষোভ মিছিল বের করেন। চাঁদপুরের সর্বস্তরের শিক্ষার্থীদের ব্যানারে বের হওয়া মিছিলটি শহরের কুমিল্লা রোড হয়ে চাঁদপুর বাসস্ট্যান্ডে পৌঁছে সড়কের ওপর অবস্থান নেয়।

এ সময় পেছন থেকে চাঁদপুর সরকারি কলেজ ছাত্রলীগ সভাপতি সোহেল হোসাইন ব্যাপারীর নেতৃত্বে একটি মিছিল আসে। সেখানে ছাত্রলীগ নেতা-কর্মীদের সঙ্গে আন্দোলনকারী শিক্ষার্থীদের হাতাহাতি ও বাকবিতণ্ডার ঘটনা ঘটে। পরে আন্দোলনকারীরা মিছিল নিয়ে শহরের মুক্তিযোদ্ধা সড়কের অঙ্গীকার ভাস্কর্যের পাদদেশে এসে অবস্থান নেন।

চাঁদপুরে সড়ক অবরোধ করে শিক্ষার্থীদের বিক্ষোভ

চাঁদপুরে সড়ক অবরোধ করে শিক্ষার্থীদের বিক্ষোভছবি: প্রথম আলো

আন্দোলনে নেতৃত্ব দানকারীদের মধ্যে অন্যতম চাঁদপুর সরকারি কলেজের ডিগ্রির শিক্ষার্থী জাহানারা আক্তার বলেন, তাঁরা শান্তিপূর্ণভাবে বিক্ষোভ মিছিল করে বাসস্ট্যান্ড এলাকায় পৌঁছালে পুলিশ ও ছাত্রলীগ বাধা দেয় এবং আন্দোলনকারীদের ছাত্রভঙ্গ করে দেয়।

এ ব্যাপারে চাঁদপুরের অতিরিক্ত পুলিশ সুপার (সদর সার্কেল) ইয়াসির আরাফাত বলেন, তাঁরা আন্দোলনকারীদের কোনো বাধা দেননি। শুধু সড়কে যানজট তৈরির কারণে তাঁদের সরিয়ে দিয়েছেন।

গোপালগঞ্জ

গোপালগঞ্জে বঙ্গবন্ধু শেখ মুজিবুর রহমান বিজ্ঞান ও প্রযুক্তি বিশ্ববিদ্যালয়ে বিক্ষোভ করছেন শিক্ষার্থীরা। বেলা তিনটার দিকে বিশ্ববিদ্যালয়ের লিপুস ক্যানটিনের সামনে থেকে বিক্ষোভ মিছিল বের করেন শিক্ষার্থীরা। তাঁরা বিশ্ববিদ্যালয়ের বিভিন্ন সড়ক প্রদক্ষিণ করে প্রধান ফটকে এসে বিভিন্ন স্লোগান দিতে থাকেন। একপর্যায়ে শিক্ষার্থীরা গোপালগঞ্জ-টুঙ্গিপাড়া সড়কের অবস্থান নেন।

গোপালগঞ্জে বঙ্গবন্ধু শেখ মুজিবুর রহমান বিজ্ঞান ও প্রযুক্তি বিশ্ববিদ্যালয়ে শিক্ষার্থীদের বিক্ষোভ
গোপালগঞ্জে বঙ্গবন্ধু শেখ মুজিবুর রহমান বিজ্ঞান ও প্রযুক্তি বিশ্ববিদ্যালয়ে শিক্ষার্থীদের বিক্ষোভছবি: প্রথম আলো
এ সময় বিশ্ববিদ্যালয়ের প্রধান ফটকে ছাত্রলীগের নেতা-কর্মীদের ও অন্য ফটকে গোপালগঞ্জ থানার পুলিশ সদস্যদের অবস্থান নিতে দেখা যায়। পরে বিশ্ববিদ্যালয় প্রশাসনের অনুরোধে সড়ক ছেড়ে ক্যাম্পাসের মধ্যে অবস্থান নিয়ে বিক্ষোভ করেন শিক্ষার্থীরা।

আরও পড়ুন

কোটা সংস্কার: বিভিন্ন স্থানে আন্দোলনকারী শিক্ষার্থীদের বিক্ষোভ, সড়ক অবরোধ

২ ঘণ্টা আগে

কোটা সংস্কার: বিভিন্ন স্থানে আন্দোলনকারী শিক্ষার্থীদের বিক্ষোভ, সড়ক অবরোধ

সাতক্ষীরা

সাতক্ষীরায় জেলা বৈষম্যবিরোধী ছাত্র আন্দোলনের ব্যানারে গণপদযাত্রা, সমাবেশ ও সড়ক অবরোধ কর্মসূচি পালিত হয়েছে। আজ বিকেল চারটায় সাতক্ষীরা শহরের খুলনা রোড মোড় থেকে এ গণপদযাত্রা শুরু হয়।

পদযাত্রাটি সাতক্ষীরা-খুলনা সড়কের নারিকেলতলা মোড়ের দিকে যাচ্ছিল। একপর্যায়ে শিক্ষার্থীরা ওই সড়কের ওপর বসে পড়ে অবরোধ করেন। পরে বিকেল সাড়ে চারটার দিকে নারিকেলতলায় এসে পদযাত্রা শেষ হয়।

এর পরপরই কয়েকটি মোটরসাইকেলে করে ২৫-৩০ জন ছাত্রলীগ নেতা লাঠি ও রড নিয়ে সেখানে হাজির হলে উভয় পক্ষের মধ্যে উত্তেজনার সৃষ্টি হয়। এ সময় উভয় পক্ষকে স্থান ত্যাগ করতে বাধ্য করে পুলিশ।

টাঙ্গাইল

টাঙ্গাইলে ঢাকা-টাঙ্গাইল মহাসড়ক অবরোধ করে বিক্ষোভ প্রদর্শন করেছেন সাধারণ শিক্ষার্থী। আজ বেলা একটা থেকে দুইটা পর্যন্ত আন্দোলনকারীরা টাঙ্গাইল শহর বাইপাস সড়কের আশেকপুর বাইপাস এলাকায় অবরোধ করে এই বিক্ষোভ প্রদর্শন করেন।

এর আগে বেলা একটার দিকে বিক্ষোভকারীরা পুলিশি বাধা উপেক্ষা করে মহাসড়কের বাইপাস এলাকায় যান। তাঁরা বিভিন্ন স্লোগান দিয়ে কোটা বাতিলের দাবি জানান। ওই সময় মহাসড়কে যানবাহন চলাচল বন্ধ হয়ে যায়।

এদিকে বেলা ১১টার দিকে জেলা ছাত্রলীগের কয়েকজন নেতা-কর্মী টাঙ্গাইল শহরের নিরালা মোড়ে অবস্থান নেন। এ সময় কোটা সংস্কার আন্দোলনকারী কয়েকজন শিক্ষার্থী মিছিল নিয়ে নিরালা মোড়ের দিকে যাওয়ার সময় হামলা ও ধাওয়া করেন ছাত্রলীগের নেতা-কর্মীরা। এ সময় ছাত্রলীগের হামলায় অন্তত তিন শিক্ষার্থী আহত হন বলে অভিযোগ করেন আন্দোলনকারীরা।

জেলা ছাত্রলীগের সভাপতি সোহানুর রহমান বলেন, সাধারণ শিক্ষার্থীরা ‘তুমি কে, আমি কে, রাজাকার রাজাকার’ বলে স্লোগান দিলে ছাত্রলীগের পক্ষ থেকে প্রতিবাদ করা হয়। তবে কারও ওপর হামলা করা হয়নি।

আরও পড়ুন

বগুড়া, ময়মনসিংহ, খুলনা, রাজশাহীতে বিক্ষোভ, সড়ক অবরোধ

৭ ঘন্টা আগে

বগুড়া, ময়মনসিংহ, খুলনা, রাজশাহীতে বিক্ষোভ, সড়ক অবরোধ
পরে সাধারণ শিক্ষার্থীদের একটি অংশ টাঙ্গাইল পৌর উদ্যানে একত্র হন। সেখান থেকে তাঁরা টাঙ্গাইল প্রেসক্লাবের সামনে
গিয়ে সড়ক অবরোধ করে বিক্ষোভ করেন। পরে মাওলানা ভাসানী বিজ্ঞান ও প্রযুক্তি বিশ্ববিদ্যালয় ও এম এম আলী
সরকারি কলেজের কয়েক শ শিক্ষার্থী মিছিল নিয়ে শহরে প্রবেশ করেন। এ সময় নিরালা মোড়ে অবস্থান করা ছাত্রলীগের
নেতা-কর্মীরা সেখান থেকে চলে যান।

পটুয়াখালীর বাউফল

পটুয়াখালীর বাউফলে বিক্ষোভ মিছিল করেছেন শিক্ষার্থীরা। আজ বিকেল পৌনে চারটার দিকে বাউফল সরকারি কলেজ
মাঠ থেকে মিছিলটি বের হয়ে বাউফল পৌর শহরের বিভিন্ন সড়ক ঘুরে শেখ রাসেল মিনি স্টেডিয়ামে এসে শেষ হয়। পরে
কয়েকজন শিক্ষার্থী কোটা সংস্কারের এক দফা দাবির যৌক্তিকতা তুলে বক্তব্য দেন।

পাবনা

পাবনা বিজ্ঞান ও প্রযুক্তি বিশ্ববিদ্যালয় শিক্ষার্থীদের বিক্ষোভ
পাবনা বিজ্ঞান ও প্রযুক্তি বিশ্ববিদ্যালয় শিক্ষার্থীদের বিক্ষোভছবি: হাসান মাহমুদ
পাবনা বিজ্ঞান ও প্রযুক্তি বিশ্ববিদ্যালয়ে আন্দোলনরত শিক্ষার্থীরা বিশ্ববিদ্যালয়ের স্বাধীনতা চত্বরে জমায়েত হন। সেখানে
তাঁরা বিক্ষোভ করতে থাকেন। ঘন্টা দেড়েক স্বাধীনতা চত্বরে অবস্থানের পর তাঁরা ক্যাম্পাসের প্রধান ফটকের সামনে
পাবনা-ঢাকা মহাসড়ক অবরোধ করেন। পরে পুলিশের অনুরোধে ৩০ মিনিট সড়ক অবরোধ শেষে শিক্ষার্থীরা ফিরে যান।

বেলা সাড়ে তিনটার দিকে সরেজমিন দেখা যায়, পুরো ক্যাম্পাসে থমথমে অবস্থা। ক্যাম্পাসের প্রধান ফটকে মোতায়ন
রয়েছে বিপুলসংখ্যক পুলিশ। আর ভেতরে স্বাধীনতা চত্বর ঘিরে বিক্ষোভ করেছেন শিক্ষার্থীরা।

আরও পড়ুন

সাত জেলায় বিক্ষোভকারীদের ওপর ছাত্রলীগের হামলা, আহত ৬৮

২ ঘন্টা আগে

সাত জেলায় বিক্ষোভকারীদের ওপর ছাত্রলীগের হামলা, আহত ৬৮

শাহজালাল বিশ্ববিদ্যালয়

সিলেটে শাহজালাল বিজ্ঞান ও প্রযুক্তি বিশ্ববিদ্যালয়ের শিক্ষার্থীরা বিক্ষোভ মিছিল করেছেন। তাঁদের সঙ্গে যুক্ত হয়েছেন
সিলেটের বিভিন্ন শিক্ষাপ্রতিষ্ঠানের শিক্ষার্থীরা। একপর্যায়ে বিকেল সাড়ে পাঁচটায় সিলেট-সুনামগঞ্জ মহাসড়ক অবরোধ
করেন শিক্ষার্থীরা। এতে সড়কের দুই পাশে তীব্র যানজট তৈরি হয়েছে। সড়কের এক পাশে অবস্থান করছেন পুলিশ সদস্যরা।

এর আগে বেলা সাড়ে তিনটা থেকে বিভিন্ন প্রতিষ্ঠানের শিক্ষার্থীরা ক্যাম্পাসে আসতে শুরু করেন। বিকেল সাড়ে চারটায়
বিশ্ববিদ্যালয়ের গোলচত্বরে বিক্ষোভ মিছিল কর্মসূচি শুরু হয়। বিক্ষোভ কর্মসূচির একপর্যায়ে বিকেল পাঁচটায় কোটা সংস্কার
আন্দোলনকারীদের উদ্দেশ্যে বক্তব্য দেন বৈষম্যবিরোধী ছাত্র আন্দোলনের শাহজালাল বিশ্ববিদ্যালয়ের সমন্বয়ক আসাদুল্লাহ
আল গালিব। তিনি বলেন, ‘আমরা শান্তিপূর্ণভাবে রাত আটটা পর্যন্ত ক্যাম্পাসে অবস্থান করব। প্রয়োজনে রাত ১২টাও হতে
পারে। আমরা সবাই একসঙ্গে থাকব।’